

**SAMOA**

Faatulagaina o Aiaiga

**VAEGA I  
FAATOMUAGA**

1. Igoa puupuu ma le amataga
2. Faamatalaina o uiga o upu
3. Uiga o auupega e taape salalau le faaaogāina
4. Faaaogāina
5. Faamoemoega

**VAEGA II  
GAOIOIGA E FAASINO  
I AUUPEGA E TAAPE  
SALALAU LE FAAAOGĀINA****Vaeveaga 1 – Soligatulafono  
ma tuusaunoaga i soligatulafono**

6. Soligatulafono
7. Tuusaunoaga i soligatulafono o i le fuaiupu 6(1)
8. Noataga o se tagata ofisa a se faalapopotoga
9. Faaaogāina o lenei Vaeveaga i nisi pomu laiti pāpā.

**Vaeveaga 2 – Gaoioiga e faasino i  
auupega e taape salalau le  
faaaogāina**

10. Faoa faamalosi, faalēaogāina, ma le faatamaia o auupega e taape salalau le faaaogāina
11. Faaaogāina o le Tulafono o le Ofisa o Tiute 1977
12. E mafai e le Minisita ona faatagaina auupega e taape salalau le faaaogāina mo nisi faamoemoega

**Vaeveaga 3 – Faamatalaga**

13. Faamoemoega o lenei Vaeveaga
14. Tuuina atu o faamatalaga

**VAEGA III  
AIAIGA ESEESE**

15. Tulafono Faatonutonu
16. Teuteuga faatupulaia

---

 2012, Nu. 11

**O SE TULAFONO e aloia ai le Feagaiga o le 2008 e uiga i Auupega e Taape Salalau le Faaaogāina, ma mo mataupu e fesootai i ai.**  
[13 Mati 2012]

**UA FAIA** e le Fono Aoaofaitulafono a Samoa i totonu o le Palemene ua potopoto e faapea:

### VAEGA I FAATOMUAGA

**1. Igoa puupuu ma le amataga-**(1) E mafai ona taua leni Tulafono o le Tulafono mo le Faasaina o Auupega e Taape Salalau le Faaaogāina 2012.

(2) O leni Tulafono e amata faamamaluina i se aso o le a filifilia e le Minisita.

**2. Faamatalaina o uiga o upu-**(1) I totonu o leni Tulafono, ae vagana ai ua manaomia e le mataupu se isi uiga e ese ai:

“**Loia Sili**” o lona uiga o le Loia Sili a Samoa;

“**auupega e taape salalau le faaaogāina ua faatagaina**” o lona uiga o se auupega e taape salalau le faaaogāina ua faatagaina i lalo o le fuaiupu 12;

“**Ofisa Sili o Pulega**” o lona uiga o le Ofisa Sili o Pulega o le Matagaluega;

“**auupega e taape salalau le faaaogāina**” e i ai lona uiga ua tuuina atu i ai e le fuaiupu 3;

“**Feagaiga**” o lona uiga o le Feagaiga e uiga i Auupega e Taape Salalau le Faaaogāina, sa faia i Dublin i le aso 30 Me 2008, lea sa sainia e Samoa i le aso 3 Tesema 2009, ma so o se teuteuga i, po o suiga o, le Feagaiga lea e, po o o le a avea, e noatia ai Samoa mai lea taimi i lea taimi, ae lē aofia ai so o se teuteuga po o suiga lea e teena e Samoa;

“**faalapotopotoga**” o lona uiga o se faalapotopotoga ua faatuina faaletulafono ua faia po o ua faavaeina faaletulafono pe i totonu o Samoa po o fafo atu o Samoa;

“**Faamasinoga**” o lona uiga o le Faamasinoga Sili a Samoa;

“**pulu laiti pāpā**” o lona uiga o se pulu o auupega masani e taape salalau:

(a) lea ua fuafua e faagaioioia e ala i le faapaina o se aofaiga o mea pāpā a o lumanai ai, i lea taimi, po o le tuanai ai o le faapaina; ma

(b) faapea ai, i le tulaga e faatinoina ai lana galuega, e faataapeina pe faamatuu ese atu e ala i se auupega e taape salalau le faaaogāina.

**“faaputugatupe”:**

- (a) o lona uiga o aseta o ituaiga taitasi uma, pe faitino pe leai, e ono feaveai pe leai foi, i le a se faiga na maua ai; ma
- (b) e aofia ai pepa aloaia faaletulafono po o pepa faamaonia i so o se faiga e i ai faamatalaga molimau o le pule i, po o se aia i ai i, aseta o so o se ituaiga.

**“maina”** o lona uiga o se auupega ua fuafuaina e tuu i lalo, luga po o tafatafa o se ogaeleele po o isi nofoaga laualuga ma o le a faapaina e ala i le auai ai, latalata i ai, po o fesootaiga a se tagata po o se taavale;

**“Minisita”** o lona uiga o le Minisita e nafa ma Mataupu Tau le Va i Fafo;

**“Matagaluega”** o lona uiga o le Matagaluega e nafa ma Mataupu Tau le Va i Fafo;

**“tagata ofisa”** o lona uiga o se sui auai o le Galuega Tau Leoleo, po o se tagata ofisa o le Ofisa o Tiute;

**“Galuega Tau Leoleo”** o lona uiga o le Galuega Tau Leoleo a Samoa;

**“Vaalele faamauina a Samoa”** o lona uiga o se vaalele ua faamauina po o ua manaomia ina ia faamauina ina ia tusa ai ma le Tulafono o Vaalele Sivili 1998, e avea o se vaalele ua faamauina a Samoa;

**“Vaa o Samoa po o vaa”** o lona uiga, ina ia tusa ai ma le Tulafono o Vaa 1998:

- (a) o se vaa po o vaa ua faamauina po o ua laiseneina i totonu o Samoa; po o
- (b) se vaa e le i faamauina po o se vaa mo se tagata lea ua taliaina le tagatanuu Samoa;

**“faiga e taofia ai le faapāina”** o lona uiga o le tuuina atu o se auupega i se faiga e aunoa ma se faatonutonuina e ala i le tulaga faaaaogāina o se vaega o auupega ia e lē mafai ona toe faafoiina i tua lea e talafeagai i le faagaioioiga o auupega;

**“faiga e faatamaia ai”** o lona uiga o se faiga ua aofia ai i totonu o se auupega, lea e:

- (a) puiipuia mai ai le faatamaia o lea auupega; ma
- (b) gaioioi e aunoa ma se faatonutonuina; ma
- (c) ua faaopoopo atu i uluai faiga ua taliaina o auupega;

**“faaliliuina atu”:**

(a) e aofia ai -

(i) le faaulufaleina mai i totonu ma le auina atu i fafo mai, Samoa; ma

(ii) le faaliliuina atu o pule i, ma le faafoega o auupega e taape salalau le faaaogāina; ae peitai

(b) e lē aofia ai le faaliliuina atu o teritori o i ai toega o auupega e taape salalau le faaaogāina.

**“auupega laiti e le i pāpā”** o lona uiga o auupega laiti pāpā lea ua faataapeina po o ua faamatuu ese e, po o ua vavaeese i se isi faiga e ese ai mai auupega e taape salalau le faaaogāina ma ua lē mafai ona pāpā e pei ona faamoemoeina.

(2) Ae vagana ai ua manaomia e le mataupu se isi uiga e ese ai, o so o se isi lava faaupuga po o fuaitau ua faaaogāina i totonu o lenei Tulafono, lea ua lē faamatalaina e tatau ona i ai lea lava uiga e pei ona i ai i le Feagaiga.

**3. Uiga o auupega e taape salalau le faaaogāina-**(1) O se auupega masani e taape salalau lona faaaogāina lea ua fuafua e faataapeina pe faamatuu atu auupega laiti pāpā, o le mamafa o le auupega e tasi e itiiti ifo i lo le 20 kilokalama ma e aofia ai ia auupega laiti pāpā.

(2) O se auupega e taape salalau le faaaogāina e lē aofia ai:

(a) se maina; po o

(b) se auupega po o auupega laiti ia ua fuafuaina -

(i) e faasoaina atu sulu afi, asu, galuega faalauiloa tau afi, po o mea iila e faasalalauina i le ea e faasese ai; po o

(ii) le gaosia ai o aafiaga tau eletise po o le faaeletoroni; po o

(c) se auupega lea ua fuafua faapitoa mo matafaioi tau puipuiga i le ea; po o

(d) se auupega lea e i ai uma itu taua ua taua i lalo, ina ia alofia ai tulaga lē mautonu o nofoaga ma tulaga faigata e tulai mai e ala i auupega laiti e le i pāpā -

(i) e aofia ai i auupega taitasi uma e lē itiiti ifo i lo le 10 auupega laiti pāpā;

(ii) o le mamafa o auupega laiti pāpā taitasi uma e sili atu i lo le 4 kilokalama;

(iii) ua fuafuaina auupega pāpā taitasi uma ia faailoa ai ma faaaogāina i se mea e tasi o tulimataia;

(iv) ua faatotogaina auupega pāpā taitasi uma faatasi ai ma se masini faaeletoroni e faaleagaina ai e aunoa ma le faatonutonuina;

(v) ua faatotogaina auupega pāpā taitasi uma faatasi ai ma se faiga faaeletoroni e taofia ai e ia lava le pā salalau.

**4. Faaaogāina-**(1) O lenei Tulafono e noatia ai le Malo.

(2) O lenei Tulafono ua faalautele atu i vaalele taitasi uma ua faamauina a Samoa, ma vaa o Samoa po o vaa.

(3) O lenei Tulafono ua faalautele atu i gaoioiga ua faia po o e lē faatagaina ona faia i fafo atu o Samoa e -

(i) se tagatanuu o Samoa; po o

(ii) se tagata e masani ona nofomau i Samoa;

po o

(iii) se sui auai o Galuega Tau Leoleo; po o

(iv) se faalapotopotoga.

(4) I le noatia ma le fai fuafua i le faafuaiupu (5), o taualumaga e tusa ai o le solia o lenei Tulafono i totonu o Samoa po o se isi lava nofoaga i fafo atu o Samoa, e lē tatau ona faagaoioia i totonu o le Faamasinoga seia vagana ai ua maua mai le maliega a le Loia Sili ma ua faamaonia e le Loia Sili e faapea e tatau ona faavavevave le faagaoioia o taualumaga.

(5) E ui lava i le faafuaiupu (4), e mafai ona pueina faapagota se tagata, po o e mafai ona tuuina atu ma faatino se tusi faapoloaiga mo le pueina faapagota o se tagata, ma e mafai ona toe auina atu se tagata e faanofo vaavaaia po o le nofo puipuia, ae peitai e leai nisi po o isi taualumaga e tatau ona faia seia vagana ai ua maua mai le maliega a le Loia Sili i lalo o le faafuaiupu (4).

**5. Faamoemoega-**(1) O le faamoemoe o lenei Tulafono ina ia faatino ai noataga a Samoa i lalo o le Feagaiga.

(2) O se tagata o faatinoina se malosiaga ua faaee atu i ai i lalo o lenei Tulafono, e tatau ona faia faapea ina ia tausisia ai noataga o Samoa i lalo o le Feagaiga.

**VAEGA II  
GAOIOIGA E FAASINO I AUUPEGA  
E TAAPE SALALAU LE FAAAOGĀINA**

**Vaevaega 1 – Soligatulafono ma  
tuusaunoaga i soligatulafono**

**6. Soligatulafono-**(1) I le noatia ma le fai fuafua i le fuaiupu 7, o se tagata o ia lea ua faia tuusao pe leai foi le tasi (1) po o le sili atu o tulaga ua taua i lalo, ua faia se soligatulafono:

- (a) ua faaaogāina auupega e taape salalau le faaaogāina;
- (b) atiae, gaosia, po o ua maua i se isi faiga e ese ai, se auupega e taape salalau le faaaogāina;
- (c) umia, taofia, po o le teuina faaputupu o se auupega e taape salalau le faaaogāina;
- (d) faaliliu atu se auupega e taape salalau le faaaogāina i se isi tagata;
- (e) fesoasoani, faamalosi atu po o le faatosina o le isi tagata ina ia auai i so o se faatinoga o i lalo o le parakalafa (a) e oo i le (d);
- (f) teufaafaigaluega tupe ma le faamoemoe o le a faaaogāina le faaputugatupe, po o ma le iloa lelei e faapea o ia tupe o le a faaaogāina, i le atinaeina po o le gaosia o auupega e taape salalau le faaaogāina.

(2) Ua faia foi e se sui auai o Galuega Tau Leoleo se soligatulafono pe afai ua ia faatoga moni i le faaaogāina o auupega e taape salalau le faaaogāina pe afai:

- (a) ua ia auai ai i gaoioiga, faatinoga, po o isi gaoioiga tau militeri faatasi ai ma fitafita faaaaupegaina a se Malo lea e le o avea ma vaega auai i le Feagaiga; ma
- (b) le filifiliga o auupega ua faaaogāina o lo o i totonu o faafoega faapitoa a le Galuega Tau Leoleo.

(3) O se tagata o ia lea ua faia se soligatulafono i lalo o le faafuaiupu (1) ma le (2) e tatau ona faasalaina, i luga o moliaga ua faamaonia faaetulafono, e ala:

- (a) i le tulaga o se faalapotopotoga, o se sala tupe e lē silia le 100,000 iunite tau faasalaga; po o
- (b) i le tulaga o se tagata moni, o se sala tupe e lē silia le 10,000 iunite tau faasalaga po o le nofosala i le falepuipui mo se vaitaimi e lē silia le fitu (7) tausaga, po o faasalaga uma e lua.

(4) O lenei fuaiupu e lē faatapulaaina ai aiaiga o le Tulafono o Auupega 1960 e faasino i mea pāpā malolosi.

**7. Tuusaunoaga i soligatulafono o i le fuaiupu 6(1)-(1)** E ui lava i le fuaiupu 6(1) e le o faia e se tagata ofisa se soligatulafono e ala i le faaaogāina, mauaina, umiaina, taofiofia, po o le faaliliuina atu o se auupega e taape salalau le faaaogāina ua faatagaina pe afai o lo o faapea ona ia faia:

- (a) i le tulaga o lana galuega po o ona tiute tauave; ma
- (b) mo faamoemoega o le atinaeina, po o le aoaina o tagata o i totonu, metotia e iloa ai auupega e taape salalau le faaaogāina, aveesea, po o le faatamaia; ma
- (c) le tausisia o so o se faasilasilaga ua tuuina atu i lalo o le fuaiupu 12.

(2) E ui lava i le fuaiupu 6(1), e le o faia e se tagata ofisa se soligatulafono e ala i le faoa faamalosi, taliaina, po o le maua mai o se auupega e taape salalau le faaaogāina pe afai o lo o faapea ona ia faia:

- (a) i le tulaga o lana galuega po o ona tiute tauave; ma
- (b) mo faamoemoega o lona faaleagaina o lea mea, taofia a o talia lona faatamaiaina po o lona faaliliuina atu ina ia mafai ai ona faaleagaina.

(3) E ui lava i le fuaiupu 6(1), e le o faia e se tagata se soligatulafono i tulaga aliae mai ua faatulaga mai i le faafuaiupu (4) e ala i le:

- (a) umia o se auupega e taape salalau le faaaogāina seia oo ina aoina mai e se tagata ofisa mai ia te ia pe faaleagaina le auupega; po o
- (b) le tuuina atu o le auupega e taape salalau le faaaogāina i se tagata ofisa o ia lea e aoina mai ia te ia pe faaleagaina le auupega.

(4) O tulaga aliae mai o lo o faatatau i ai i lalo o le faafuaiupu (3) o:

- (a) le tausisia e le tagata o le fuaiupu 14; ma
- (b) e faapea, i se taimi vave lava e mafai ai ona faatino i le tuanai ai ona iloa lona umiaina o se auupega e taape salalau le faaaogāina, sa faia e lea tagata laasaga talafeagai uma ia faamautinoa ai e faapea e le i faaaogāina lea auupega a o le i aoina mai pe faaleagaina e se tagata ofisa.

(5) E ui lava i le fuaiupu 6(1), e le o faia e se tagata se soligatulafono, e ala i ana po o lona faatinoga i fafo atu o Samoa e faasino i se auupega e taape salalau le faaaogāina lea e:

(a) mo faamoemoega o -

- (i) lona faaleagaina; po o
- (ii) le mafai e le isi tagata ona faaleagaina le auupega ; po o
- (iii) le tuuina atu e aunoa ma se afaina; po o
- (iv) le mafai e le isi tagata ona tuuina atu e aunoa ma se afaina; ma

(b) ina ia tusa ai ma le Feagaiga.

(6) E le o faia e se sui auai o Galuega Tau Leoleo se soligatulafono e faasaga i le fuaiupu 6(1) i le na o le auai i le tulaga o ona tiute tauave, i gaoioiga, faatinoga, po o isi gaoioiga faamiliteri faatasi ai ma fitafita faaaupegaina a se Malo lea e le o se vaega auai o le Feagaiga, ma o lea e i ai le tulaga e mafai ai ona auai ai i faatinoga ua faasaina e le fuaiupu 6(1).

**8. Noataga o se tagata ofisa a se faalapotopotoga-**(1) I le noatia ma le fai fuafua i le faafuaiupu (2), pe afai ua faia se soligatulafono e se faalapotopotoga, o tulaga ua taua i lalo, e faapea foi ma le faalapotopotoga, e tatau ona avea e faapea ua nofosala i se soligatulafono:

- (a) o se tagata o ia lea i le taimi o le faia o le soligatulafono sa avea ai ma faatonu po o sa faamoemoe e galue i sea tulaga;
- (b) o se tagata o ia lea i le taimi o le faia o le soligatulafono sa avea ma pule po o sa faamoemoe e galue i sea tulaga;
- (c) o se tagata o ia lea i le taimi o le faia o le soligatulafono sa avea ma failautusi po o sa faamoemoe e galue i sea tulaga;
- (d) o se tagata o ia lea i le taimi o le faia o le soligatulafono sa avea ai ma se isi tagata ofisa faapena o le faalapotopotoga e tutusa ma i latou o i lalo o le parakalafa (a), (b) ma le (c) po o sa faamoemoe e galue i sea tulaga.

(2) O se tagata o taua i lalo o le faafuaiupu (1)(a) - (d) e lē tatau ona avea e faapea ua nofosala i se soligatulafono pe afai o le tagata ua faamaonia e faapea:



- (a) sa faia le soligatulafono e aunoa ma lana maliega, o taupulepulega, faiga faalilolilo po o nisi tulaga e ese ai; ma
- (b) sa ia faatinoina uma ia tulaga i le loto naunautai ia taofia ai le faia o se soligatulafono e pei ona tatau ai ona faatinoina, i le amanaia ai o le uiga o lana galuega tauave i lea tulaga ma i tulaga uma e aliae mai.

**9. Faaaogāina o lenei Vaeveaga i nisi pomu laiti pāpā-(1)** I totonu o lenei fuaiupu, **o pomu laiti** pāpā o lona uiga o se auupega masani:

- (a) lea e lē faatonutonuina e ia ia lava; ma
- (b) o lona mamafa e itiiti ifo i lo le 20 kilokalama; ma
- (c) o lea ua fuafua e faagaoioia e ala i le faapaina o se aofaiga o mea pāpā a o lumanai ai, i lea taimi, po o le tuanai ai ona faapaina; ma
- (d) faapea ai, i le tulaga o le faatinoina o lana galuega, e faataapeina pe faamatuu ese atu e ala i se masini e faasoa atu ai.

(2) E faaaogā aiaiga o lenei Vaeveaga, faatasi ai ma so o se fesuiaiga talafeagai, i pomu laiti pāpā lea ua fuafuaina faapitoa ina ia faataapeina pe faamatuu atu mai le masini e faataape ai o faapipii i se vaalele, e faapei ai o ia pomu laiti pāpā ua o ni auupega e taape salalau le faaaogāina.

## **Vaeveaga 2 – Gaoioiga e faasino i auupega e taape salalau le faaaogāina**

**10. Faoa faamalosi, faalēaogāina, ma le faatamaia o auupega e taape salalau le faaaogāina-(1)** O se auupega e taape salalau le faaaogāina e tusa ai o se soligatulafono ua faia e faasaga i le fuaiupu 6:

- (a) e mafai ona faoa faamalosi e aunoa ma se tusi faapoloaiga e tuuina atu e se tagata ofisa; ma
- (b) pe afai e lē umia e le Malo, e faoa i le Malo; ma
- (c) e tatau ona:
  - (i) faatagaina i lalo o le fuaiupu 12; po o le
  - (ii) faaleagaina e se tagata ofisa.

(2) O se auupega e taape salalau le faaaogāina e ao ona faaleagaina i lalo o le faafuaiupu (1)(c)(ii), e tatau ona taofia, talia le faatamaiaina, e pei ona manatu le Minisita ua talafeagai ai.

**11. Faaaogāina o le Tulafono o le Ofisa o Tiute 1977** - O aiaiga o le Tulafono o le Ofisa o Tiute 1977 lea e faaaogā e tusa ai o oloa e faasaina ona faaulufale mai ma auina atu i fafo, ae vagana ai faasalaga mo soligatulafono i lalo o lea Tulafono, e tataua ona faalautele atu ma faaaogā e faatatau i auupega e taape salalau le faaaogāina, o lona faaulufaleina mai ma le auina atu i fafo ua faasaina i lalo o lenei Tulafono, i tulaga uma e faapei ai o le faaulufaleina mai po o le auina atu i fafo o oloa sa faasaina i lalo o le Tulafono o le Ofisa o Tiute 1977.

**12. E mafai e le Minisita ona faatagaina auupega e taape salalau le faaaogāina mo nisi faamoemoega-(1)** Mo faamoemoega o le atinaeina, po o le aoaoina o tagata i auala e faailoa atu ai, aveesea ai, pe faatamaia ai auupega e taape salalau le faaaogāina, e mafai e le Minisita e ala i se faiga tusitusia, ona faatagaina auupega e taape salalau le faaaogāina ina ia faaaogāina, mauaina, umia, taofia, po o le faaliliu atu.

(2) E lē tataua i le Minisita ona faia se faasilasilaga i lalo o le faafuaiupu (1) pe afai o le faia o le faasilasilaga o le a taunuu ai i le aofaiga atoa o auupega e taape salalau le faaaogāina ua faatagaina e ala i faasilasilaga uma ua faia i lalo o le faafuaiupu (1), e sili atu i le aofaiga ua fuafuaina mo lea taimi e le Minisita i lalo o le faafuaiupu (3).

(3) E ao i le Minisita ona faamaoti, e ala i se faasilasilaga i totonu o le Savali ma i totonu o se tasi nusipepa o faasalalauina i totonu o Samoa, le aofaiga o auupega e taape salalau le faaaogāina ua fuafuaina e le Minisita e ao ona avea lea ma aofaiga i le taimi nei o se aofaiga maualalo lea e matua talafeagai mo faamoemoega o faasinomia i totonu o le faafuaiupu (1).

### **Vaevaega 3 – Faamatalaga**

**13. Faamoemoega o lenei Vaevaega** - O le faamoemoe o lenei Vaevaega ina ia faamautinoa ai:

(a) e faapea e i ai i le Ofisa Sili o Pulega le malamalamaaga o le tagofiaina o auupega e taape salalau le faaaogāina lea e faafaigofie ai le faia o lipoti a Samoa po o faamalamalamaaga i lalo o le Feagaiga; ma

(b) e faapea o Samoa ua mafai i se isi tulaga e ese ai ona faamalieina ona noataga i lalo o le Feagaiga.

**14. Tuuina atu o faamatalaga-**(1) O se tagata o ia lea e faaaogāina, atiae, gaosia, maua mai i se isi tulaga e ese ai, umia, taofia, po o le faaliliu atu o se auupega e taape salalau le faaaogāina e tatau ona:

- (a) logoina le Minisita e uiga i auupega e taape salalau le faaaogāina i se taimi vave lava e mafai ai ona faatino; ma
- (b) teuina faamaumauga e faasino i auupega e taape salalau le faaaogāina ma le faamoemoe ua teuina ai ia auupega e taape salalau le faaaogāina; ma
- (c) saunia mai na faamaumauga, ma auina atu i le Ofisa Sili o Pulega, ia lipoti faavaitaimi lea e lava atoatoa e faasino i auupega e taape salalau le faaaogāina, ina ia mafai ai e le Minisita ona fuafua pe o le Feagaiga, o lenei Tulafono, ma so o se tulafono faatonutonu ua faia i lalo o lenei Tulafono, ua tausisia.

(2) O se tagata ua faia se soligatulafono o ia lea e:

- (a) aunoa ma se mafuaaga talafeagai, teena po o le lē mafai ona tausisia le faafuaiupu (1); po o
- (b) i totonu o so o se pepa aloaia ua saunia i lalo o le faafuaiupu (1), ua faia ai se faamatalaga po o ua lē faia ma le iloa so o se mataupu, po o ua lē faautauta pe, o le faamatalaga po o le lē faia ua taupepeloina ai le pepa aloaia po o le taufaasese ai i totonu o se faamatalaga faapitoa.

(3) O se tagata o ia lea ua faia se soligatulafono i lalo o le faafuaiupu (2), e tatau ona faasalaina, i luga o moliaga ua faamaonia faaletulafono:

- (a) pe afai o le tagata solitulafono o se faalapotopotoga, i se sala tupe e lē silia le 10,000 iunite tau faasalaga; po o
- (b) pe afai o le tagata solitulafono ua o se tagata moni, i se sala tupe e lē silia le 1000 iunite tau faasalaga, po o le nofosala i le falepuipui mo se vaitaimi e tasi (1) le tausaga, po o faasalaga uma e lua.

(4) E leai se mea o i totonu o lenei fuaiupu e faatatauina i se tagata i lana gaoioiga e faasino i se auupega e taape salalau le faaaogāina e le o se soligatulafono e faasaga i lenei Tulafono e tusa ai o le fuaiupu 7(5).

**VAEGA III  
AIAIGA ESEESE**

**15. Tulafono Faatonutonu** - E mafai e Le Ao o le Malo, i le faia i luga o le fautuaga a le Kapeneta, ona faia tulafono faatonutonu, e ogatasi ma lenei Tulafono, e faatonutonu ai mataupu uma e manaomia po o ua faatagaina e lenei Tulafono e ao ona faatonuina, po o ua tatau pe talafeagai ona faatonuina mo le tauaveina po o le tuuina atu o tulaga aloaia i lenei Tulafono, ma i le tulaga faapitoa, ia faia aiaiga mo, po o e tusa ai o tulaga ua taua i lalo:

- (a) ua aiaia ai mo so o se mataupu lea e talafeagai pe manaomia mo le faamoemoe o le faatinoina o le Feagaiga;
- (b) faatonuina o soligatulafono e tusa ai o le soliga o, po o le lē tausisia o, so o se tulafono faatonutonu ua faia i lalo o lenei Tulafono;
- (c) faatonuina o faasalaga e lē silia le 100 iunite tau faasalaga mo soligatulafono e faasaga i tulafono faatonutonu ua faia i lalo o lenei Tulafono;
- (d) ua aiaia ai mo so o se isi lava mataupu ua fuafuaina e lenei Tulafono, ua talafeagai mo lona faafoega, po o ua talafeagai mo le tuuina atu i lona tulaga aloaia atoatoa.

**16. Teuteuga faatupulaia** - Ua teuteuina le fuaiupu 14(1) o le Tulafono o Malosiaga o Leoleo 2007 e ala i le aveese o le upu “O le” ma suia i upu “I le noatia ma le fai fuafua i le Tulafono mo le Faasaina o Auupega e Taape Salalau le Faaaogāina 2012, o le”.

---

**O le Tulafono mo le Faasaina o Auupega e Taape Salalau  
le Faaaogāina 2012 o lo o faafoeina e le Matagaluega  
o Mataupu Tau le Va i Fafu ma Fefaatauaiga.**

**Lolomiina e le Failautusi o le Fono Aoaofaitulafono,  
i le pule a le Fono Aoaofaitulafono.**